

四庫全書

史部

欽定四庫全書

硃批諭旨卷一百  
史部  
六十九至  
七十三

臣 永瑢 恭 校

編 修 臣 裴 謙 覆 勘

總校官中書臣朱 鈐

校對官助教臣胡予襄

謄錄監生臣馬和龍

欽定四庫全書

硃批諭旨卷一百六十九

硃批王世琛奏摺

提督山東學政臣王世琛謹

奏為奏

聞事雍正四年十一月初八日臣接准部劄欽奉

上諭二道一飭勵士習一薦舉優行臣跪讀之下仰見  
皇上加意作人敦崇實行之

聖心臣職司學政敢不夙夜殫心正己率屬宣揚

聖化除通行各屬曉諭外即每於各學生童試文後令  
伊等當堂公舉品行優劣并採訪平日鄉評合之  
教官所報分別懲獎應俟歲試畢造冊送部任滿  
之日繕疏彙

題至於有猷有為有守之士固未可多得臣現在悉  
心體訪確實亦俟通省試畢後擇其材品尤異灼  
然可信者方敢登諸薦牘不敢草率濫舉以負

皇上鼓勵學校化民成俗之意所有微臣現在欽遵  
上諭奉行緣由合行奏

聞謹

奏

十室之邑必有忠信者焉若能虛公採訪莫慮時無真  
才也勉之毋忽

提督山東學政

臣

王世琛謹

奏為敬陳武生教演之法以收實用事竊查武生原

以儲干城之選文義雖不可闕尤當以騎射膂力  
為重但入學之後教官止能考課文義不能教演  
武藝平日無事必至怠惰荒廢或更恣其勇悍之  
氣游手生事為害鄉里勢所必然臣愚以為宜就  
附近標營春秋開操時令該教官督率伊等一體  
演習該標營官加意教導如有怠惰不率教者該  
教官責懲頑抗者詳草處治如有弓馬嫻熟為人  
勤謹可用者該弁與教官呈送臣衙門考驗確實

即移咨撫鎮衙門效用并酌定效用年分擇其中材力出羣者比照年滿千總例咨部引

見恩賜擢用如此則武生益加鼓舞不致怠廢而每歲操演亦必無游手生事之患矣臣愚昧之見伏候

聖裁謹

奏

武生隨營操演之說且緩至其為害鄉里豈止於此而已

提督山東學政臣王世琛謹

奏為謹陳東省監穀積貯事竊惟常平倉穀每歲出  
陳易新存七糶三所以平穀價杜朽蠹法至善也  
而東省昔年所收捐納備賑之穀分貯各道府州  
縣倉者獨未議及出陳易新之例臣聞初收捐時  
原止穀價後將價分發各處糶穀貯倉至今已十  
餘年久貯之穀恐至霉爛臣請

皇上敕部定議照常平倉例令各該管官每歲出陳易



新則民間青黃不接時可以平價濟民食而倉儲亦不致浥爛矣臣又聞分發穀價有至今尚未糴足者有因前此虧空後經追出尚未糴穀者此項銀兩存貯府州縣庫恐易虧空臣愚以為宜分別府州縣之大小酌定應貯之數竝查現在貯穀數多足備賑給者將未糴穀之價繳貯藩庫其現在貯穀數少者將所存穀價酌量多寡限一二年內穀熟時糴穀入倉如此則兩三年內倉皆新穀而

存貯之價亦無虧空之虞矣臣愚昧之見伏候

聖裁謹

奏

出陳易新便於收貯原屬良法係朕夙昔所知者

提督山東學政臣王世琛謹

奏為請杜生監干預公事之端事竊東省濟兗東三府所屬州縣俱有漕米定例徵收本色兌運因州縣之離水次遠者運送維艱又濱海之沙土產米

原少山僻之區車行不便此等州縣向皆糧戶折價與官官遣役往水次糴米兌運漕務無誤民亦稱便無如州縣官明知折價之便民而懼違徵收本色之定例恐地方劣惡生監訐告阻撓故每年於徵漕時先集生監公議折價聯名具呈州縣乃據以申詳上司出示徵收此臣所聞徵漕之事一也其他或更有如此類者亦未可定臣思此等事既無誤於公有益於民州縣官即應詳明上司定

議奉行何必假借生監以示公論倘欲於公論之中存自利之私則劣惡生監必有逢合意指劓民媚官以為結交把持之端從此妄行生事州縣官不復能制矣臣請

皇上敕下督撫凡地方公事應隨時隨地斟酌宜民者皆令地方官據實詳明督撫小則批示大則請

旨如有假借生監呈議申詳者即係假公濟私將地方官生監一併叅處如有地方官詳議允協而生監

故意阻撓者即行褫革從重治罪如此則有司盡  
職而生監安分干預公事之端可杜抑臣更有請  
者東省向來徵漕折價之州縣仰懇

皇上敕下督撫於每年秋收時該州縣將米穀時價詳  
報督撫酌定折價數目曉諭糧戶輸納州縣官仍  
於水次糴米兌運如有於定價外浮徵者即行叅  
處則州縣無違例之嫌漕務易辦官民俱沐

皇恩於無既矣謹

奏

九卿速議具奏

提督山東學政臣王世琛謹

奏為奏

聞事臣學識庸陋蒙

皇上簡任督學山東歲試已周現在接行科試通省士

習仰被

聖天子訓諭諄諄誠感激悔悟日就循謹至通省今歲夏

秋兩熟百穀俱各豐稔瑞麥嘉禾所在多有臣巡  
試所至目覩熙皞之休風沾被光華之

帝治得以策勵駕銳勉奉職守實深慶幸茲據所聞士  
習錢糧二事不揣愚昧繕摺恭呈

御覽伏祈

聖恩裁鑒謹

奏

覽

條陳地方事宜二摺留中至徵收隱弊之奏諒田文鏡自能區畫得法必另有一番整飭也

提督山東學政

臣

王世琛謹

奏為請杜州縣徵收之隱弊事竊查東省州縣拆封時皆令本學教官監拆但新舊錢糧不一每番拆封時戶名不啻千萬計教官豈能逐一查算自不得不隨州縣具文詳報且聞櫃書隱弊種種不一為今之計必先使現徵之銀無可那動又必使糧



戶實完之數不由州縣開報不俟拆封司府先已知之而後那動之端可杜臣酌陳末議伏候

聖明俯賜裁擇

一徵收之法設流水號簿連三串票而此每日徵收之數直俟拆封始行總報上司則改多為少司府何從查察臣以為宜於連三串票中再添解上司一票當糧戶完銀時櫃書將給糧戶解上司兩票一併寫交糧戶親齎赴學教官驗明騎縫號印

始將兩票截開一給糧戶一存教官再於流水簿外設日收簿每本百頁騎縫用府印該縣每日查對流水串根挨號鈔入日收簿分晰新舊款項算明總數鈐印就所鈔之若干頁拆開於次日移送該學教官將昨日糧戶所交之票與該縣所送日收簿挨號查對明晰即將所收之票若干張簿若干頁每日各自封固鈐用學印積至五日票解知府簿解藩司是不由州縣開報不待拆封司府已

皆知其實徵之數俟至半月或一月知府彙計總數一面詳司一面委員監拆如數起解倘有不符即行嚴究如此則徵拆之數絲毫難以那動官役無從侵隱矣

一州縣新舊交代查核完欠全憑流水串根今聞竟有捏造隱匿託言遺失者新任無憑查核若欲傳集糧戶細查蠹書等即賄買里民詭名承認新任信以為實便行接受後雖覺察而接受在前恐

干處分轉為掩護矣臣請嗣後離任官有將流水串根捏造隱匿託言遺失者新任官即行揭叅先議處分查出實弊照例追究如臣所陳票解知府簿解藩司之處蒙

恩准行則新任官詳請府司將收存票簿發出查對便完欠瞭然姦蠹無所售其欺矣

一東省錢糧有糧戶將銀面交櫃書秤估如式然後眼同封固入櫃者有糧戶自己封固入櫃櫃書

據所開銀數寫給串票者此自己所封之銀當拆封時或致低潮短少其中固有糧戶作姦而櫃書乘間偷換之弊亦多臣以為收銀時宜悉令櫃書秤估如式眼同糧戶封固入櫃倘有低少責之櫃書賠補不得濫拘糧戶則櫃書偷換與糧戶作姦之弊俱可杜矣

一教官所有書役亦止辦學政文移如臣所陳蒙恩准行則每日收發串票繕寫文牒其事較繁應另行

募選書役專管照州縣總吏例滿考職以酬其勞  
如有於驗票時收發遲延勒索紙筆費用者州縣  
不時查察其查對不實遺漏票簿詳解遲延并勾  
通州縣櫃書作弊者司府不時查察役則草處官  
則究叅

以上諸款在州縣官吏必以為繁瑣難行但錢糧  
關係重大若能不厭煩勞使蠹役無能作姦將行  
之漸熟竝亦不覺其煩上清

國課下恤民生而官之受益鴻多矣謹

奏

東省新命田文鏡兼轄以田文鏡之歷練老成總督其地自必一一清理何庸汝未達吏治之書生管見為耶且閱汝條奏內有許多窒礙難行處即或可行於簡僻之州縣而繁劇之處則萬不能行夫既不能通行無礙止於簡僻地方不論如何施設皆可又何必多此一番煩擾迂腐之謂汝何以免

硃批諭旨卷一百六十九



欽定四庫全書

硃批諭旨卷一百七十

硃批噶爾泰奏摺

雍正元年七月十一日巡視兩浙鹽課

臣噶爾泰

謹

奏為請除墮民丐籍以廣

皇仁以端風化事

臣

於雍正元年三月內見御史年熙

以山陝樂籍沉淪日久

題請削除以正風俗當蒙

聖恩憫惻

敕部遵行中外臣民聞風懽舞臣今奉

特旨巡視兩浙訪聞紹興府屬之八邑有所謂墮民者

細問土人并查紹興志書相傳為宋罪俘之遺故

擯之而名以墮民其內外率習污賤無賴四民中

居業不得占四民中所籍不得籍即四民中所常

服彼亦不得服特別以辱之者也又籍曰丐戶自

言宋將焦光瓚部落以叛宋故被斥曰墮民男子  
只許捕蛙賣錫逐鬼為業婦則習媒或伴良家新  
娶嫁為人髻冠梳髮或穿珠花羣走市巷兼就所  
私醜穢不堪辱賤已極實與樂籍無二間有流入  
他方者人皆賤之臣細思此輩在宋有應得之罪  
處之固宜今已墮落數百年生息蕃衍豈皆盡無  
廉恥實因無路自新是以終沉孽海伏乞

皇上特沛恩綸請照山陝樂籍一併剷除使堯天舜日

之中無一物不被其澤豈獨浙省墮民生者銜環  
死者結草即萬世之後共戴

皇恩於無既矣為此專摺跪

奏伏乞

皇上敕部議奏施行謹

奏

該部議奏

雍正三年九月十一日巡視兩淮鹽課臣噶爾泰

謹

奏為報明癸卯綱經解等費用存銀兩事前經

欽差部堂會同

題定每年額徵經費解費腳價等銀共七萬七千五百九十三兩零除扣存俸工代解土稅官役俸工紙張水手塘兵工食解餉齋奏領引等項一年約用銀三萬八千餘兩外餘剩銀三萬八千餘兩向係院道各半分為日用之需相應照舊應用等因

併行運司遵照在案今據運司何世璣詳報前來  
查癸卯一綱經費解費腳價等項共該銀七萬七  
千七百八十一兩零內除一切公私項下開銷外  
臣存餘銀二千六百九十五兩零又庫內存有辛  
壬等綱未撥錢糧即有存庫水腳今辛壬等綱錢  
糧奉部撥解除支給解腳各費外仍有餘銀九千  
三百八十七兩零除運司應得一半外臣又有餘  
銀四千六百九十三兩零二共餘銀七千三百八

十九兩零

臣蒙

自恩調任兩淮清查浮費其存剩銀兩不敢絲毫隱瞞  
業經盡數節省存庫再查得

欽差部堂會同

題定存冊內鹽院衙門書工承差各役等費又各商  
每年自付使費銀共三萬九千五百九十八兩應  
存以聽該御史自行酌量節省應用等因在案今  
癸卯綱

臣

除應給書吏承差各役書工紙張飯食

等項之外加意節省銀一萬五千七兩零合共節省銀二萬二千三百九十六兩零現貯運庫聽候撥解理合

奏明伏乞

皇上睿鑒施行謹

奏

爾之可嘉處朕筆諭不盡勉之勉之

雍正三年十一月初八日巡視兩淮鹽課

臣噶爾



奏謹

奏為敬承

諭旨恭謝

天恩事竊臣前奏為報明癸卯綱經解等費用存銀兩

事一摺欽奉

硃批臣跪讀之際感深泣下伏思臣何人斯受

皇上天高地厚之恩

御筆嘉予

欽定四庫全書

硃批諭旨

卷一百七十

五

溫綸勉勵臣肝腦塗地實難報稱惟有謹遵

聖訓仰體

聖心益自奮勉供職以盡犬馬報

主之心於生生世世耳謹此具摺叩謝

天恩伏乞

皇上睿鑒謹

奏

凡人靡不有初鮮克有終須堅守此志勿使遷移勉之

雍正四年七月二十八日巡視兩淮鹽課

臣噶爾

奏謹

奏為恭請

陛見以申犬馬微忱事竊

臣自蒙

皇恩巡視兩浙繼又

調任兩淮識淺才疎寸長未效迄今三載有餘未得一

覲

天顏時深孺慕茲又奉

欽定四庫全書

硃批諭旨

卷一百七十

六

恩旨再留一年

聖諭嘉獎

溫綸寵錫臣雖粉骨碎身不能圖報除另疏叩謝

天恩外思欲趨赴

闕廷叩請

聖安跪聆

聖訓但未經

奏請不敢擅離職守為此跪懇

皇上天恩准臣入京

陛見以申犬馬微忱伏乞

睿鑒施行謹

奏

朕從不無故施恩願受恩者朕即施之從不無故示罰  
甘領罰者朕即示之皆在爾等自取朕不預定成見也  
知此當勉所以永久受恩之道此心此行切勿改移更  
不可稍有放縱爾請陛見甚好於九月下旬到京可也

雍正五年正月十八日巡視兩淮鹽課臣噶爾泰

謹

奏為據實奏

聞事竊臣蒙

皇上天高地厚之恩於臣任內應行事宜固當勤慎詎  
勉即地方之事有所見聞亦不敢不據實陳

奏臣看揚州府知府呂大雲人還明白偏在好體面  
漢軍統袴子弟常態大率如此輕浮二字更切伊之行  
一邊但言行輕浮訪其居官說伊聰明自是者多

動操

守究竟何如再加細訪據實奏聞

聲名平常又聞得近日新收門生三人一係鹽商

吳世昌之子吳玉山一係鹽商汪德睦一係儀徵

縣開慶譽當舖店吳之梁訪得曹頌年原不成器少無才遇事

畏縮織造事務交與管家丁漢臣料理臣在京見

豈止平常而已

郭汝樞官聲如此范

過數次人亦平常有江寧府知府郭汝樞操守平

時繹

石麟同城共事何以姑容之耶

石麟實好

常居官聲名不好聞得布政司石麟居官謹慎聲

徐琳

原係熟練刑名之員向有聲稱

名好按察司徐琳有慎重刑名之好名臣細加訪

察今將所聞據實奏

聞謹

奏

覽

雍正五年三月初十日巡視兩淮鹽課

臣噶爾泰

謹

奏為恭謝

天恩事雍正五年二月二十七日江寧織造曹頻自京

回南至儀徵鹽所

臣

衙門

臣

跪請



聖安曹頰口傳

聖諭以臣等呈進龍袍及豐燈香袋等物皆用繡地靡  
費無益且恐引誘小民不務生產有關風俗

特命傳

諭微臣欽遵隨叩頭謝

恩訖臣上年蒙

皇上召進

陛見三聆

欽定四庫全書

硃批諭旨

卷一百七十

九

聖訓臣仰體

皇上諄誠淮商崇尚節儉無事奢侈今復蒙

恩諭勸勉教誨益見我

皇上惠愛元元保育羣生之至意臣惟加意恪遵仰體

聖心凡兩淮衆商時時勸勉務使敦本崇儉醇朴成風

耳為此謹

奏

向來奢侈風俗皆從織造衙門及鹽商富戶興起天津

此等陋習今被莽鵠立整飭四年以來較前已改革八九兩淮地方爾其竭力勸導之可也

雍正五年三月十五日巡視兩淮鹽課臣噶爾泰  
謹

奏為

皇恩浩蕩難名犬馬私情未展叩詳

題達少報涓埃事據兩淮運使張坦麟詳稱據商人黃光德汪勤裕馬裕汪晉德公呈前事呈稱竊念

商等辦運淮南荷蒙

皇上洪恩疊沛深仁厚澤浹髓淪肌去歲商等公同捐輸原不過少效微忱實未足以仰酬

高厚又奉

恩旨即在揚州府起建義倉積貯米穀

聖天子推恩溥海惠遍蒼生商等即欲將倉廩工程自行捐造因係營建之初不敢冒昧紊瀆今義倉已經告成所有建倉銀兩商等情願一總公捐不敢

動支庫項庶蠲蟻微忱借以少申萬一伏叩轉詳  
據情

題達等情到司據此該本司查得商人黃光德等願  
捐建倉銀兩實係歡忭從事情切急公已於雍正  
四年六月開工雍正五年二月告成照原估極力  
節省銀一千三百九十五兩零實共用銀五萬一  
千三百一兩零已經造冊送部查核在案今現奉  
俞旨於近竈之地建倉積貯米穀以備賑恤似應詳請

將四商願捐銀兩統於近場地方建倉積穀添用  
等情并據商人黃光德等呈同前由各等情前來  
據此臣目擊商人等願捐之心出於至誠不敢壅  
於

上聞為此據實具

奏伏乞

皇上睿鑒施行謹

奏

覽淮商急公情詞似屬出於本心所奏知道了

雍正五年七月十一日巡視兩淮鹽課

臣噶爾泰

謹

奏為叩乞

皇恩事伏蒙

皇上特恩令於場竈就近地方著將商人乙巳公捐銀  
二十四萬兩酌量建倉積貯現已

進呈建倉圖式并開工日期另行具本

題報外今臣衙門有商人公捐乙巳公務銀八萬兩  
現存道庫叩乞

皇恩賞准

臣

添作場窰建倉積貯之用

臣受

恩深重感戴難名犬馬之心萬難圖報惟有益加勤慎  
保商恤窰以仰副

浩蕩洪慈養育羣生之至意於萬一耳為此繕摺具  
奏伏乞

皇上睿鑒施行謹



奏

覽

今命爾兼署布政司事須做做石麟為之萬不可涉於  
小見柔善沽譽希邀屬員感悅爾之操守朕可保不易  
但恐徇私情市小惠流為鄉原習氣耳勉之

雍正五年七月二十四日巡視兩淮鹽課臣噶爾  
泰謹

奏為

聖主洪恩疊沛草茅報效無由叩鑒蟻忱據情

題達事據商人黃光德呈前事呈稱切商辦運兩淮

至微極賤屢沐

皇恩生全保育雖極頂踵捐糜不足仰報

皇仁於萬一甲辰一綱公捐餉銀蒙

皇上即於揚州起建義倉以儲積貯乙巳一綱公捐餉

銀復蒙

皇上又於各場起建義倉以恤窮竈

聖天子德竝生成仁育萬物必使普天率土無一夫不  
獲其所誠自古迄今聖帝哲王之所未有也但商  
以辦運徵商屢邀

異數而犬馬私情毫末未能報效近伏讀

上諭念江浙戶口蕃庶

特命督撫諸大臣興修水利以重農工商不揣冒昧敢  
效微忱情願捐銀八萬兩上佐水利之需少報涓  
埃為此伏叩俯鑒愚誠據情

題達等情前來據此臣見商人黃光德情詞懇切願捐踴躍不敢壅於

上聞謹據呈奏

聞伏乞

皇上睿鑒施行謹

奏

黃光德願捐情詞已悉其所捐銀兩不必收受喻止之可也

雍正六年五月初十日署理江南安徽布政使

臣

噶爾泰謹

奏為奏明安徽布政司衙門一應事宜仰祈

睿鑒事竊臣蒙

特旨令署理安徽布政司印篆受事以來凜遵

聖訓照前司石麟辦理兢兢業業勉力實心不敢苟安

圖逸不敢絲毫欺假所屬府廳州縣有怠惰昏庸

秉公破面難事也言之太易朕不敢信

催科無術者即詳督撫叅處不敢稍有徇容祇緣

臣賦性愚蠢兼之布政司衙門事務頭緒紛繁一時難以周知不敢冒昧遽行具

奏今辦理九月有餘諸事俱已查清所收錢糧亦有成數謹另單臚列進呈

御覽伏乞

皇上睿鑒謹

奏

此任非巡鹽可比巡鹽但能清楚錢糧即為稱職至藩

司乃守土之官有率屬察吏之責兼且該督撫皆中常才具而魏廷珍尤屬巧宦惟知保身固位而已所以云爾此任實係繁難須勉之又勉公以服衆勤以補拙庶幾獲免玷缺少若愛惜精力瞻顧情面因循姑息豈止有忝厥職更恐將來不勝其累也勉之毋忽

雍正六年七月初六日署理江南安徽布政使臣

噶爾泰謹

奏為恭謝

聖訓竝繳

御批仰祈

睿鑒事竊照

臣

署理安徽布政司印篆謹將署任事宜

具摺奏

聞蒙

皇上批諭教誡諄切勉勵維殷

臣

跪讀之下不勝感激

惶恐伏思

臣

庸愚下質仰荷

皇上屢賜教訓有加無已安敢愛惜精力瞻徇情面姑



息徇隱下玷職守上負

聖恩惟有愈加罷勉欽遵

聖訓勤以補拙公以服衆率屬察吏不敢稍懈仰答  
高厚於萬一耳所有奉到

御批奏摺理合恭繳伏乞

皇上睿鑒謹

奏

覽

實力加勉以仰副朕望可也

雍正七年正月二十五日署理江南安徽布政使

臣噶爾泰謹

奏為奏報安徽布政司衙門續收錢糧仰祈

睿鑒事竊臣蒙

聖恩命署安徽布政司印篆凜遵

聖訓勤以補拙不敢偷安公以服衆不敢存私盤查所屬錢糧不敢稍有懈怠稽查屬員賢否不敢一毫

瞻徇州縣火耗止於加一往年雜派禁革無遺總  
期潔已率屬察吏安民仰副我

皇上澄清吏治愛養元元至意今將雍正六年五月起  
至十二月止一應錢糧數目另摺臚列具

奏伏乞

皇上睿鑒謹

奏

覽奏俱悉爾其竭力秉公為之料理錢糧固屬職分內

事究以糾察屬吏甄別賢否為要務所謂勤之一字當  
身體力行勿致稍懈

雍正七年二月初四日署理江南安徽布政使

臣

噶爾泰謹

奏為恭謝

天恩事竊臣家人於二月初二日回南捧到

皇上恩賜福字臣隨即跪迎恭設香案望

闕叩頭謝

恩訖伏念臣至微至賤蒙

皇上天高地厚之恩歷任鹽差委署布政數載以來諸

事仰遵

聖訓謹慎奮勉惟以始終不改時刻自警言才識淺薄毫  
無報稱又蒙

恩賜福字臣晨夕供奉如覲

天顏一飲一啄更當知福不特臣一身即臣子子孫孫

得以仰承

天錫綿綿之福耳為此繕摺恭謝

天恩謹

奏

覽

江寧城內正月以來連次被盜兼有旗兵種種不法舉動朕悉於他處聞之汝今何顏對朕若云不聞不見是乃無耳無目木偶人也如知之而隱匿不奏辜負朕恩有過汝者乎似此光景豈特不知福且恐福將盡矣思

之甚為寒心向後倘仍然一味欺隱徇情沽譽朕焉用  
是好好先生為耶慎之戒之

雍正七年三月二十日署理江南安徽布政使

臣

噶爾泰謹

奏本年三月十五日

臣

家人回南捧到

臣

蒙

皇上恩賜福字恭謝

天恩一摺欽奉

硃批

臣

跪讀之下戰慄恐懼無地自容本城內屢次被

盜兼旗兵種種不法此等緊要之事臣實在如同

木偶竝不留心疎忽聾瞶之罪死有餘辜臣受

皇上天高地厚之恩不特今生難報來生來世亦萬難

圖報若臣知而匿不奏

聞更應萬死臣實是尸位木偶竟未留心今蒙

皇上格外施恩不即嚴加懲責猶

賜硃批教訓臣感泣羞愧如死方甦惟有仰體

聖心戒慎自勉處處留意事事小心凡有見聞即據實



具

奏萬不敢辜負

皇上天恩教訓之洪慈也

臣感激難名望

闕泥首百叩請罪謹將

臣

訪確被盜案件竝應行嚴謹

緣由另摺奏

聞謹

奏

似此圖報甚為可嘉未留心三字豈可於朕前支吾明

屬欺妄之言

同日又

奏今將江寧城內被盜應行嚴禁緣由逐一開陳伏

乞

皇上睿鑒

一省城五方雜處街市寬濶巷道四通八達盜賊  
便於行走其無柵欄之處甚多俱應添設柵欄責  
成居民輪流看守

一城北地方空曠如紅土山等處聞得盜賊多在其間出入雖有派防兵丁不過虛應故事似宜派撥弁兵相地添設堆子更番實力巡查定以考核之法

一城內鷹揚營地方寬濶營兵住居甚多其親戚子弟多遊手好閒之人交接匪類而匪類多藏匿其中旁人不敢過問應責令城守營嚴行稽查

一江寧省城風氣一更二更街市燈火不斷正買

賣喫食之時巡夜者坐轎騎馬燈籠火把僕役跟隨盜賊窺見先已迴避自三更以至五更巡夜者俱已回家人盡睡熟盜賊便於行事且巡夜者多在熱鬧街道而深巷及城北空曠之處杳不一巡此巡夜虛應故事也

一秦淮河在江寧城內有東西水關直通城外五月以後水漲客船遊船往來不斷盜船亦扮作遊船雜入九月以後水退又有小船停泊於夜靜捕

魚名雖捕魚其間竟爲盜賊隱身寄食之地似應責成水城門嚴加稽查出入

一乞丐之中有姦匪混跡爲盜賊引線皆由丐頭容留丐頭之容留皆由地方官之不稽查如年壯無殘疾之人乞食者不許容留

以上數端乃江寧城內多盜之由要比皆地方文武玩弛如果實力嚴禁捕緝則盜賊自然斂跡矣又訪得各門上需索錢物不特旗兵亦有不肖旗員

在內合併奏

聞謹

奏

不但爾為木偶行尸闔城總督以下皆係無耳無目人  
也將此等瑣屑之務混行瀆奏觀爾誠然福盡矣直待  
奉旨後始行查訪以前所作何事既知地方上種種不  
應之處何以不言之總督將軍至今方奏聞耶

雍正七年四月初二日署理江南安徽布政使

臣

噶爾泰謹

奏竊

臣

前奏滿洲城內拏獲賊犯周二供報夥犯夥

盜數處今上元江寧二縣俱已審明周二又在江

寧縣供出積賊許二係副都統立柱衙役該縣業

稟副都統將許二發理事同知衙門查審又訪察

城內江寧上元二縣地方正二三月之內被盜之

家共七處已報官者三處未報官者四處又訪得

城內三月二十七日十廟地方井內撈起爛屍一

人遍身皆有傷痕城內非道路村莊可比有此等  
事皆地方官不嚴加巡查所致又訪得城內小倉  
地方營兵開場鬪雞輸贏俱至數十兩營兵係喫  
糧防守地方之人乃開場鬪雞賭博匪類因而聚  
集此皆由營將平日並不稽查約束所致謹據實  
一併奏

聞謹

奏



將此等事當一面申飭地方有司一面言之總督將軍  
及營將等共相約束稽查既在同城事關一體曷可膜  
外視之

硃批諭旨卷一百七十

欽定四庫全書

硃批諭旨卷一百七十一

硃批趙城奏摺

雍正六年十月十一日湖南布政使臣趙城謹

奏為奏明奉到

諭旨恭謝

天恩事竊本年八月二十九日臣於郵封內接書一封

內開和碩怡親王大學士張廷玉字寄湖南布政

使雍正六年八月初三日奉

上諭各省藩臬有准其具摺奏事者亦有本人未曾奏請具摺朕遂未曾降旨者今思藩臬乃地方大員應准其各就所見具摺陳奏且即此可以觀其人之居心辦事爾等可寄信與湖南布政使趙城伊若有陳奏事件初次具摺差人交門上奏事人轉奏嗣後從何處轉奏朕再降諭旨可也欽此遵

旨寄信前來

臣

捧讀之下感激涕零隨恭設香案望

闕叩頭謝

恩訖伏念臣邊徼寒微叨蒙

皇上天恩畀以湖南藩司重任迴思前此疊受之

殊恩更邀目今

特頒之異數自顧何人仰沐

高厚一至於此臣具有人心何忍不誠求報效無如才

識短淺自復任以來雖夙興夜寐勉盡職司而於  
愧懼果出於實心何事不克辦集耶勉之勉之務除盡  
國計民生毫無裨益靜夜輾轉愧懼實深茲奉

科甲一切崇私好薄公義之陋習方為不負朕之任用  
諭旨許臣摺奏事件臣愚昧無知謹就日前管見所及

也  
者敬陳一事繕摺具

奏此後一有聞見不時據實陳奏竝懇

天恩將嗣後從何處轉奏之處再降

諭旨以便欽遵臣謹

奏

嗣後奏摺交與大學士蔣廷錫轉奏

同日又

奏為請定養廉銀兩解司分給以免州縣那虧事竊  
查湖南所屬各州縣徵收錢糧先於雍正元年前  
督臣楊宗仁檄飭每地丁銀一兩許加耗銀一錢  
內將三分解司以充地方公用其餘七分以一分  
五釐給藩司竝作部餉解費六釐給臬司四釐給  
巡道一分給知府三釐給同知三分二釐給州縣  
為各衙門辦理公務以及日用薪水之需乃有不  
肖之員見養廉一項前督臣檄內有具摺

奏明之語遂視為應有無所忌憚每於錢糧開徵之時不顧州縣已未徵收即行牌催解或致劄要求甚至需差下縣坐索守提更有不肖牧令久具逢迎之心無由趨奉一見行催不復計及

國帑遂將正項先動墊解以圖上司歡悅夫正供錢糧尚有完半全完之期而隨徵之項反得先行交納因而預支早解彼此相習及至上司遷離多收之項不便過問惟有那新掩舊以應接任之催積



習日久勢必釀成虧空臣請嗣後徵收加一火耗  
飭令州縣隨同正餉照數全解交臣衙門仍將三  
分留充公用州縣應得三分二釐亦按正數即給  
解餉人役領回其餘三分八釐存貯司庫如解交  
之數足以給發行令各衙門差役赴司具領仍照  
在任起止月日給發倘遇遷轉離任免致透支其  
有署事兼攝官員雖公事繁多不無需費但既有  
本任養廉未便又全給署任養廉應請扣存一半

貯司庫統歸公項以為地方公用如此庶養廉不致冒濫而州縣亦免那虧矣如果臣言可採伏乞

皇上睿鑒施行臣謹

奏

與督撫臣商酌行之

雍正七年二月十五日湖南布政使臣趙城謹

奏為敬繳

硃批奏摺恭謝

天恩事雍正六年十二月初五日臣家人捧回臣前奏

恭謝

天恩一摺請定分給養廉一摺到臣隨恭設香案望

闕叩頭謝

恩跪閱

硃批竊查科甲出身之人往往崇私好薄公義實屬向

來陋習臣荷格外

聖恩不敢稍蹈陋習自棄生成之外今蒙

聖訓諄切不敢不實心勉勵力圖報效至分給養廉一

如果行能踐言朕諭為不虛矣勉之

事臣欽奉

諭旨即稟明督撫正在商酌疊奉

恩綸命撫臣將各府雜稅贏餘銀兩添為各官養廉又  
諭清查各府未經首報贏餘一併散給

恩波浩蕩至於此極臣現在行查一俟查確即請督撫

酌量均分至臣衙門原於加一火耗內收一分五

釐坐平為養廉臣於上年二月回任至十二月封

印止共收過坐平養廉銀一萬二千七百二十三  
兩九分除臣署內薪水修金工食紙筆及一切用  
度竝地方公事捐銀又臣前年父母身後安厝等  
費皆出借貸今償還借欠以上共用過銀一萬一  
千五百餘兩此外尚存羨餘以備解餉等項之用  
又思

聖主隆恩雜稅贏餘添為各官養廉臣衙門養廉既頗  
有餘自應裒多益寡臣今現與撫臣商酌就官職

大小事件繁簡通長計算酌量均分務使普及

聖澤俟酌定後請撫臣具

奏謹將奉發

硃批奏摺恭繳謹

奏

覽

凡事宜揆酌情理秉公執中為之亦不必矯廉自異朕所取者惟一是字耳

雍正七年七月初二日湖南布政使臣趙城謹

奏為州縣解司糧銀請令隨帶法馬以杜中途侵蝕

事竊臣查通省地丁糧銀於開徵之後陸續起解

赴司彈貯充餉此定例也其彈兌法馬從前奉部

頒發之後所屬州縣各照製一副赴司呈較臣衙

門較準轉呈撫臣衙門驗明飭發較戩稱收花戶

糧銀及至起解即用前發法馬彈兌起解原所以

杜出輕入重之弊也今各屬解司糧銀按封彈兌

輕少甚多每百兩一秤有少至四五錢及七八錢不等<sub>臣</sub>思州縣既各有較準法馬起解之時自必

照依彈兌即不無偶爾參差何至大有輕少復加

查訪蓋緣州縣起解錢糧必差家丁同糧書管解

彼此串通行至中途私啓印封任意侵蝕以致到

司彈兌即有輕少在藩司以為州縣解銀輕少惟

飭按數補解在州縣又以為上司秤頭重大不敢

明言上下岐視若輩遂得中飽<sub>臣</sub>謹就管見所及



詳明督撫請令州縣起解錢糧將原呈驗較準領  
去法馬隨餉解司先將法馬較兌隨彈錢糧如無  
輕少按照彈收倘有輕少再用州縣法馬彈兌實  
屬輕少即係中途侵蝕立行嚴究追補竝將解役  
懲治如此則州縣起解藩司彈收皆不容不秉公  
而姦胥串同中途侵蝕之弊可以永杜臣具詳督  
撫已奉批准檄飭各屬遵照現今行之頗有成效  
臣思藩庫收貯錢糧各省事同一例胥役人等中

途舞弊亦不能保其必無臣芻蕘愚見如有可採

伏乞

皇上敕下部議可否通行直省似亦杜弊之一端也臣

謹

奏

自任內事尚未知能行與否何暇念及他省亦可謂舍  
己之田而耘人之田矣

硃批諭旨卷一百七十一

欽定四庫全書

硃批諭旨卷一百七十二

硃批王奕仁奏摺

雍正二年十二月十八日提督貴州等處學政翰

林院編修臣王奕仁謹

奏為遵

旨條陳事竊臣於雍正二年二月二十七日恭請

聖訓仰蒙

皇上面諭學臣無地方責任有見聞的確之事即當據實敷陳隨便於巡撫提督處附奏欽此臣到任之初

一切利弊訪聞未的不敢輕瀆

天聽數月以來歷試五郡有關係學政之事理合奏聞又以外關防考試未獲遇便附

進今歲暮旋省謹從撫臣毛文銓處附

進奏摺六件因字數繁多一事各具一摺仰求

聖恩全覽臣不勝感激依戀之至謹

奏

字數繁多何有妨礙但閱所奏數事皆不出於公誠頗  
近私巧

同日又

奏為請嚴武生考課以宏造就事竊惟學校之設原  
以養育人材文武諸生總屬一體舊例文生員於  
歲試後另行錄科武生有歲試而無科試即以歲  
試所取一二等准作科舉以臣愚見竊謂中人之

質每藉策勵而後有成若考課疎畧自然容易廢弛況武生重在騎射技勇苟不時加簡閱恐其歲試之後不復勤於演習黔省士子不安本分者大半皆屬武生良由怠於肄業遂致習為匪類仰懇皇上聖裁敕部酌議令學臣於科考時照文生之例將武生一體科試方准錄送進場如此則武生習藝不敢懈怠既可漸改把持包攬之習而

國家亦可以收得人之效矣至於武童入學自當仍

遵定例三年舉行一次不必於科試時再行錄取  
也如果芻蕘可採仰祈

睿鑒施行謹

奏

據奏為造就人材起見欲將武生加添科試則當具題  
請旨候議覆施行非應摺奏之事也

同日又

奏為苗童宜加化誨以移風俗事臣查黔省苗多漢

少其類不一各有生熟二種生苗遠藏巖穴自耕  
自織從不輸賦熟苗猶通功易事任土納糧名雖  
有生熟之分實均係

朝廷赤子自當漸次招懷俾得盡沾

雨露況其中非無秀良子弟可以化導裁成臣愚以為

苗人有不奉約束為民之害者督撫提鎮諸臣以  
兵威法令攝服之其慕義向風有志上進者應藉  
師儒之教以引掖造就之惠威兼施遐邇胥服今



各府州縣皆設有義學臣請

敕令地方官出示曉諭嗣後苗人子弟情願讀書者許  
赴各該管府州縣報名准其一體送入義學專令  
訓導一員嚴加教誨倘蒙

皇上格外施恩再於歲科兩考各州縣定額取士之外  
加進苗童一名以示鼓勵則蓬頭跣足之子莫不  
觀感興起漸化而為良善矣謹

奏

此奏引苗向化是或一道亦當與撫臣會商可否

同日又

奏為據實陳明仰祈

睿鑒事本年九月內

臣

在大定州考棚懸牌於二十日

考試畢節縣文童忽於十九日有畢邑生員邵藩

奭指稱童生邵汝鈞為伊家奴同族人邵景奭等

混行政打經大定州知州蘇霖泓將邵景奭等拏

至州署責禁隨有劣生糜染盛等往教官寓中尋

覓保邵汝鈞之廩生毆打復令童生傅才選等取  
去邵汝鈞試卷致將冊卷搬散據提調官知州蘇  
霖泐詳報臣以考試事關鉅典豈容劣生肆行無  
忌一面鎖拏為首生童交提調官嚴審一面出示  
畢邑童生候具

題另考隨據大定平遠畢節等州縣各官詳據合邑  
生童再四懇求轉請收考臣查童生與事者不過  
二人其餘皆安分讀書不相關涉仍示期考試今

據知州蘇霖泓等審擬邵藩奭指邵汝鈞為家奴  
事雖有因但年代久遠已無契券可據臨考攻擊  
明係借端生事殊屬不合已將生員邵藩奭等除  
名分別杖責枷示童生傅才選等俱夾訊杖責其  
為首指使童生擅取試卷之糜染盛雖經除名預  
先逃避現在嚴拏俟緝獲到日審擬結案臣按試  
之時有此一事理合據實奏

聞至

臣

初莅外任不諳律例邊郡愚蒙為細故而干

國憲應否從寬發落伏乞

聖恩指示施行謹

奏

邊方愚頑無知藐法自當題叅嚴加懲處以申功令似此罷軟姑息將就完結殊屬玷職

同日又

奏為恭懇

皇上頒賜

御製朋黨論一冊廣布學宮以正人心以端學術事本

年十一月內

皇上頒賜

御製朋黨論於撫臣及布按二司臣從平越回至省城

始得恭覲

宸章口誦心維手舞足蹈臣以微員何敢邀

天文之錫獨念黔省五十一學士子鄙陋寡識往往糾

黨營私致被褫責仰懇

聖恩俯加憐憫

特賜朋黨論一冊容臣摹勒上石刷印數百本齎送各

學令司鐸之員於朔望日召集生童宣揚

聖教使遐陬僻壤人人知立身報

國之大義處則為鄉黨自好之士出則為夙夜匪懈  
之臣人心以正學術以端黔省士子永荷生成於  
大造矣謹

奏

該部議奏

同日又

奏為黔省寄籍廩生改歸壅滯仰懇

聖恩暫免撥回事竊臣於雍正二年五月初四日

題請禁革童生冒籍之弊部議准行并令撥歸從前

寄籍生員奉

旨依議臣現在遵依部劄查明別省冒籍者不論廩增

附生武生盡數撥回至本省寄籍生員亦逐處清



查改正惟是各學廩生食糧有定額挨貢有定序  
一旦改歸多寡不均難易頓別如貴陽安順兩府  
學黃平黔西兩州學各多至五六十名廩糧難給  
出貢無期似屬未便至於偏僻州縣如永寧永從  
等州學縣學本籍廩生不過三五名出貢補廩又  
覺太易此臣原疏所以不敢遽請撥回也查黔省  
通融考試原奉

題定之例亦有童生自就本籍應試而歷任學臣以

已意撥往別學者較之他省私自冒籍者實有分  
別仰求

聖明憐念寒生食廩出貢之難許臣先將增附生武生

撥回其廩生暫免改撥一遇本生中式出貢等事

即行改歸原籍寬限數年悉當釐正黔省諸生感

戴

聖恩無既矣伏乞

皇上敕部施行謹

奏

此事可否通融當與督撫酌議會題何得自具密摺奏  
請觀爾數奏殊不妥協將朕此諭與毛文銓看爾等妥  
商具奏慎之慎之

硃批諭旨卷一百七十二

欽定四庫全書

硃批諭旨卷一百七十三

硃批于振奏摺

提督湖北學政翰林院修撰臣于振謹

奏恭請

皇上聖安

朕安條奏數事甚屬可嘉候發廷臣議奏

提督湖北學政翰林院修撰臣于振謹

奏為

聖諭之化導最宏

廣訓之牖民孔易請通行鄉會試以彰

德教事欽惟我

皇上至孝至誠善繼善述追念

聖祖仁皇帝聖諭十六條直接十六字之心傳永為億萬

年之

寶鑑是以

躬親紬繹闡導宣揚文至萬言

訓垂六合又復

加恩士子

頒賜學宮俾成人小子皆得祇誦

綸言淑身善行此誠牖世覺民之盛心也

臣職司學政

凡童生覆試之日導

例默書

廣訓一條

臣

間令詮釋皆能言其大義伏思

萬言廣訓既已用之於歲科即當行之於鄉會臣愚以為鄉會試第二場應照童生覆試之例於論表判之前敬謹默寫

萬言廣訓一篇有能敷陳大義者令其以意詮解敬謹書於

廣訓之後用以觀其誦習之勤惰驗其詮釋之是非以為去取則人知自勵鼓舞向風

聖祖之寶訓與日月共其昭回



皇上之恩綸與天地同其悠久其於世道人心大有裨益矣臣謬獻芻蕘伏乞

睿鑒謹

奏

所為廣訓者即訓蒙之謂只可用之於歲科不當行之於鄉會此奏殊屬識見卑小

提督湖北學政翰林院修撰臣于振謹

奏為請定文武童生之增額以歸畫一事案查雍正

二年內欽奉

上諭令督撫學臣查明實在人文最盛州縣題請小學  
改為中學中學改為大學大學照府學之額取錄等  
因通行各省欽遵

題改在案臣查湖北一省雖經前任督撫學臣查明  
各屬人文最盛之州縣會

題增額在案但是時歲試已訖所有武童增額之處  
並未舉行至臣莅任以來始當遵

例加額而部文內止有取進童生之語並未註明文  
武字樣事關

大典未敢輕率因檢查舊案查得湖廣學額於康熙  
四十四年經前學臣潘宗洛

題請將人文最盛之黃梅縣由中學改為大學雲夢  
縣暨湖南之桂陽縣由小學改為中學嗣後文武  
童生皆一例加額迄今遵照無異則此番增額自  
應文武童生一例加增方與改學之

恩例相符臣既按臨各府復恐各省取進童生或有參

差互異之處隨移咨隣近之河南湖南江西安徽

各學臣詢其作何加增之處隨據河南學臣于廣

咨回內稱豫省奉有

題准陞學之州縣業經前學臣王國棟照額取進文

武童生一體加增造冊報部在案等語至江西安

徽兩省回咨又稱未奉兵部明文止於文童照額

加增武童仍照舊額等語而湖南回咨則稱業經

咨部未有回覆歲試武童於原額之外另照應增  
名數牌示坐號以待部覆等語是一加額也而數  
省奉行互異若此似非所以仰體我

皇上優崇學校之至意臣請

敕下該部議定畫一之例永遠遵行則

恩膏溥被士風益振矣為此繕摺具

奏伏乞

皇上睿鑒施行謹

奏

汝且照江西安徽兩省之例循行可也

提督湖北學政翰林院修撰臣于振謹

奏為請

旨事竊臣前奏為請定文武童生之增額以歸畫一事

一摺奉到

硃批臣跪讀之下仰見我

皇上尊崇學校慎重名器之盛心誠至周至當矣但臣

有愚昧之衷不得不縷陳於

皇上之前者

臣

去年到任之後即檢查一切舊案內有

康熙四十四年前學

臣潘宗洛

題改黃梅雲夢桂陽等學一案自

題改之後文武童生皆一例加額迄今遵照無異復

咨照豫省亦與湖廣之舊例相同

臣

一時冒昧以

為此番增額自應文武童生一例加增方與改學

之

恩例相符所以按臨各府業經遵照

題准陞學之額文武童生一體加增造冊在案茲奉諭旨照安徽江西例行則各學增取之武童竝應裁汰以歸舊額臣業已冒昧增取於前若又朦朧裁汰不據實

奏明愈非敷廣

皇恩之意為此再行陳

奏可否格外邀



恩免其裁汰仍俾文武童生一例增額抑以事關

大典未便濫觴懇求

聖恩容臣另行具疏請

旨統祈

皇上睿鑒指示施行至臣身任學政不能詳慎於前輒

增舊額冒昧之愆伏乞

敕部察議臣不勝戰慄之至謹

奏

新進小臣無知孟浪未經奉示何得專擅已交該部察  
議矣



硃批諭旨卷一百七十三